

Vervolg op ut vurrig interview

[Jubileum: 50 jaor rapido](#) >> [Jubileumjaar](#)

'n Paar leuke verhaole van zakeman Pieter in China.

Zoeas ik in 't interview al aangegaeve heb reis ik al 16 jaor veur Kusters Engineering door China en India.

Vanaaf mienen iersten daag in China heb ik unne vaste begeleider en det is Gao.

Weej kinne 't good met elkaar vinde en trekke altièd same op.

Hae is jônger dan mich en beschouwd mich as zien aldere broor, in 't chinees (Lau).

Lang neet alle chinese zakeluujs spraeke good ingels, dus unne tolk kinse neet misse.

In China spraeke ze Mandarijn waat auk op schoël ônderweze wuerd, de kins 't vergelièke met ôs ABN.

't Mandarijn oftewaal "Chinees" geneump is eigenlijk unne verzamelnaam veur 14 tale en de meis gespraeke taal ter waereld..



De minse in China zien erg gasvreej maar de môs ièrs vrinde make en unne band opbouwe met de minse um dich haer, dan kinse aan 'n netwerk gaon werke.

De chineze zien bescheide en hebbe vuel minsekinnes.

Direk den iersten daag teste ze ôngemerkt dien gedraag en dien reacties, unne opschöppler hebbe ze meteen door en dan kinse 't schödde met dien zake.

Eur filosofie is: ièrs de gaste 'n plezeerig gevoel gaeve door 'n gooje sfeer te schöppe.

Det wilt zegge, lekker met eur gaon aete, vuel same te drinke en op alles te prooste.

't Aete is prima met veural verse vis en greunte.

Beej 'n zakediner steit alles op 'n groëte dreischiëf mitte op de taofel met de lekkerste dinger. Sôms vindse naeve dienen bord nog 'n pekske sigarette of 'n kadoetje as welkôm..

'n Raukverbod, dao hebbe ze in China nog noëts van gehuerd.

As d'r boëtelandse zakerelaties kômme hebbe ze veur de vrouwe en de manne 'n apart programma gemak um eur op un leuke meneer te ôntspanne.

De vrouwe laote ze leuke dinger doen, ze gaon iets bezichtige of naor 'n winkelcentrum.

De manne laote ze ondeugende dinger doen, zoeas gokke, karaoke of naor de "kapper" gaon, waosse achterdoor neet allein kins laote knippe en schaere, maar det is 'n ander verhaol.

"Publieke" vrouwe zien verbaoje in China.

Ik vind eure laevesstiël neet erg gezônd.

Euverdaag wuerd d'r flink gewerk en de lunch is nog zônder alcohol maar 's-aoves beej 't aete met collega's dreit 't miër um 't drinke dan um 't aete.

D'r wuerd auk duchtig gerauk.

Ik had 't in 't begin te drök um met stekskes te liére aete en had gennen tièd um vuul te drinke, laot staon te rauke.

Met stekskes aete kos behuerlik waat oefening, die dinger zien vuel te smaal !

De iërste waeke kreeg ik aan taofel den boèk ech neet vol.
Gaef mich maar 'n stevige vorket en 'n mets dao kinse waat mei.
Beej zakelikke beejeinkômste in 'n restaurant haet idder gruupke zien eige ruimte.
De belangrièkste persoën zit aan de kop van de taofel, meestal met 't gezich naor de deur.
Rechts naeve um zit de 2e belangrièkste persoën en links naeve um de 3e belangrièkste persoën.
Nemus geit direk zitte, unne chinees plaats zich neet op de veurgrônd maar wach aaf.
Eur taofelmenere zien waat minder elegant, aan taofel bóere geit gewoën tössedoor.
Smakelik aete heb ik d'r nog noëts eine huere zegge, ze valle gewoën aan.

't Aete is altièd prima verzörg maar as ik eure gás bin wilt idderein met mich prooste.
Sôms leet miene buurman mich iets te aete op den bord waat hae lekker vind, puur oët vrindschap of sympathie.
De chineze aete veural 't knapperig gebakke vel b.v. van de pekingaend, 'n slang of van 'n ander biës, weej aete leever 't vleis.

In de beginjaore ging ik meestal met 'n stök in de kônt naor bed want zoëvuel alcohol waar ik neet gewind en nao 'n paar daag brik dich det op.
Ik hoofde gelökkig noëts zelf te riejje maar de kriegs toch zoë langzamerhand 'n hólter kópke van det prooste.

Ik kós auk neet altièd mien kamer truuk vinde.

Want in 14 daag tièd zoot ik in 5-6 verschillende hotels en de hebs taegeswaardig genne sleutel miër met 'n nummer d'rop.

In Beijing heb ik al 15 jaor dezelfde kamer det is waal gemekkelik en dao zaet de aafdeilings-secretaresse as ik oët de lif stap al:

Sir, your room is to the right of as ik oët un andere lif stap: to the left.

Nae, het geit zelf neet mei !!

Alles mösse lière en auk trucjes veur bedinke um 't op te losse maar nao zoëvuel jaor lök det hiël aardig.



Waat ik auk heb môtte lière is um alles te aete. Ik lösde allein maar gehakballe, buenkes, petatte en soep.

As ik in Venlo met zake-relaties ging aete oot ik tomatensoep en zigeunerschnittsel, det ging d'r auk nog waal in.

Maar asse det dreej jaor gedaon haes kômme dich de schnitsels de neus oët en ik kreeg unne haekel aan roëje soep.

Nao zoëvuel jaor reize is det drastisch veranderd en ik heb zelfs hônd gegaete waat mich achteraf pas verteld is gelökkig.

't Vleis waar neet viës, waal 'n bietje tei en woord in unne groëte kaetel/wok gekaok wao idderein zich oët opschöpde.

Maar zoëas ik al vertelde, alles dreit in China um vrinde make, belangrièk veur dien netwerk en de kumps euveral mekkelikker binne.

't Zien echte groepsminse die zich zônder vrinde doëdôngelökkig zoele veule.

'n Chinees gezegde is: **Unne man dae elke aovend um 7 oor thoës is haet 't neet gemak.**

Det wilt auk zegge det de meiste managers gen gezinslaeve hebbe.

Ze bringe de meisten tièd door met de collega's
Opa en Oma zôrge veur 't kind en vanaaf de 5 jaor gaon de kinder op 'n internaat en zien
allein in de wiekende thoës.

D'r wuerd groëte drök op gezatte um te studere en te prestere.

Op 't platteland hebbe ze auk waal ens 2 kinder, det wuerd door de vingers gezeen.

In Nederland is 't veur de werkende elders en de kinder 'n hiël stök gezelliger geregeld.

Chinese vrouwe zien preuts en bescheide maar in 't zakelaeve waere manne en vrouwe as
geliëke beschouwd.

Alleen meuge vrouwe neet zát waere beej de gebroèkelikke zakediners.

Daoveur hebbe ze unne assistent meigenaome dae de meeste drenkskes veur eur naor binne
schöd.

D'r zoele in Nederland genôg leefhebbers veur te vinde zien as oétzendkrach!

Minder leuk waar 'n aantal jaore geleeje 'n reis van 4 waeke naor India, 't langste det ik van
hoès bin gewaes.

Ik kreeg dao voedselvergiftiging en bin toch gewoën door gegaon met werke.

Nou ja gewoën waar 't neet, eigelik waar 't allein maar zwaor aafzeen.

Doorwerke asse 3 waeke diarree haes is neet verstendig, want ik kwaam 15 kg. lichter truuk.

Wie Toos mich aaf kwaam haole op ut vlegveld, leep 't mich straol veurbeej, het kós mich



bijna neet mièr truuk en schrök zich kapot.

Ik waar d'r slech aan toe en 't haet lang gedeurd veurdet ik weer den "alde" waar.

Maar d'r staon auk vuel leuke en moëje dinger taegeneuver.

As oètsmièter nog 'n leuk verhaol.

'n Aantal jaore geleeje zoot ik met Gao, miene chinese vrind, op unne groëte vaerboët op de Yangtze-rivier

D'r leep unne man rônd met 'n hiele groëte schildpad in 'n net.

Ik vroeg waat d'r mei ging gebeure en hae woel det biës verkaupe op de mert.

Dan woord d'r schildpadsoep van gemak die in China nog steeds gegaete wuerd.

Ik vroeg wiewuel hae woel hebbe veur die schildpad, nao un bietje aafdinge kwame we oèt op 100 dollar.

Ik heb die schildpad van um gekoch en weer truukgezatte in zië.

't Zien tenslotte beschermde biëste en die huere neet in de soep.

Die spontane aktie waas ôngewild 't gesprek van den daag.

Maar dae man waas tevreeje en had geld um van te laeve en de schildpad hoofde neet in de soep.

In 'n managerseuverleg neume ze det geluif ik: *'n win-win situatie*

'n Moëj chinees spraekwoord : A real manager never smokes his own cigars.

Elly van Elswijk

Laatst vernieuwd: 24-06-2010 om 15:40

[\[truuk\]](#)

Commentaren

Pieter door N. Timmermans-Winter op 28-04-2010 om 22:52

Wat ein prachtige verhaole. Ik bin in mien laeve neet erg vuüel wiejer gewaes as Mettendorf.

Dus ik heb van dit inter-

vieuw genote. Danke Pieter desse dit met ôs wils deile en Elly veur ut werk des dich heej aan haes.

Ik kiek oët nao ut volgende interview.

Nell.